



07.Maj 2019

UPA2019/168

Apeqquteqaat aallaavigalugu oqallinnissamik siunnersuut, Aatsitassanut Inatsimmi aatsitassarsiorluni ingerlatseqatigiiffiit nunatsinni qallorneqartut suliareqqeqqaarlugit nunanut allanut anninneqarsinnaanerannik piumasaqarsinnaatitaaneq atuutiinnassava.

(Inatsisartunut ilaasortaq Aleqa Hammond, Nunatta Qitornai)

Namminersorneq pillugu inatsimmi allassimavoq inuiaqatigiit pisuussutinut piginnittuusugut, taamaalilluni oqartussaaffiup inissisimanagera apeqquuserneqarsinnaanani.

Piginnittut sinnerlugit Inatsisartut inatsisissanik atuuttussanut sinaakkutit suliarineqartarput tamannalu aatsitassanut ikummatissanullu tunngatillugu inatsisit malinneqarput, taamaattusaavorlu.

Inuiaqatigiisugut imminut napatissugut. Inuussutissarsiornikkut, ilinniarsimassutsikkut, aalisarnikkut, sulisoqarnikkut, angallannikkut, kiffartuussinikkut sutigut tamatigut imminut napatissugut pilersorlutalu. Allanik isumalluuteqarnerup annertuumik inuiaqatigiit tatisimaneqarnerinik nassataqartartoq qaangerniarlugu nikiit tamaasa atorlugit imminut napatissinnaassuseqarnerput annertusartariaqarparput.

Inuussutissarsiuutit amerlanerit, periarfissat amerlanerit, isertitassat nutaat aammalu inuussutissarsiorsinnaaffiit ilinniarfiusinnaasullu tassuma malitsigisai nutaat pisariaqartippavut avaqqunneqarsinnaanngillallu. Aaqqissuussinermi nutaasumi pisariaqarput atorluagassaraavullu kinguaassavut pillugit, nunarput pillugu.

Aatsitassarsiornermi aallartitsisoqassaaq akuersissoqassaarlu nunarput inuilu pillugit. Aallartitsisoqassappat akuersissummillu tunisisoqassappat aatsitassanut ikummatissanullu inatsimmi § 1, imm 2 naapertorlugu, ingerlatassat aatsitassanut ikummatissanullu inatsimmi pineqartunut ilaapput isumallaallisaanermut, peqqinnissamut, avatangiisinut, isumalluutinik atorluaanermut aamma inuiaqatigiinni piujuartitsinissamut tunngatillugu isumannaatsumik kiisalu naleqquttunik aammalu pissutsini taamaaqataani nunani tamalaani suleriaatsinut pitsaasunut naapertuuttumik suliarineqarnissaat anguniagaavoq.

Marmorlimmi aatsitassamik piiaanermi piffimmi suliareqqiinerup ingerlanneqarsimanerata kingorna ukiiorpassuannngortuni uillut nerineqarnissaanik kaammattuineq unitsinneqarpoq, taamaasillunilu avatangiisinut mingutsitsisimanerup inooriaaseq aammalu nerisaqariaaseq sunnersimavaa. Pissutsit tamakku ilikkarfigalugit aammalu allat periusersimasaat pinngitsoorniarlu inatsimmi avatangiisitsinnut sunniutaasinnaasut erseqqissut piumasaqaatigilersimavagut.

Nunatta Qitornai

Inatsisartuni



Aatsitassaatitta piiarneqarnernerini annissorneqannginnerinilu soorunami qularnanngitsumik tamatta kissaatigissuarput iluanaarutissaq, suliffeqarnissamillu qulakkeerinnittussaq annerpaaq anguniarlugu sulissasugut. Ilaatigullu suliareqqiisarnermi avatangiisitsinnut annertuumik mingutsitsisinnaanermut nassataqassappat nalilersuineq sakkortooq piussaaq, tamassumalu avatangiisit pillugit piumasaqaatinut malinnissinnaanerup aammalu periusissap qanoq ittuunera aaliangiisussaaq suliamiit suliamut assigiinngitsuusinnaasoq.

Oqallisissiamik siunnersuummut soqutiginarluinnartumut qujavugut.